

Mantegnair la valur da la forza idraulica

La regenza respunda a l'incumbensa da la fracziun burgais-democratica dal cussegl grond

DA MARTIN CABALZAR

■ **La regenza grischuna è pronta d'inoltrar a Berna in'iniziativa chantunala ch'intenda da mantegnair la valur da la forza idraulica en Svizra. Quai resorta da la risposta da la regenza a l'incumbensa parlamentara inoltrada da la fracziun burgais-democratica.** Sco quai ch'il schef da fracziun *Andreas Felix* (pbd Tschintg Vitgs) constatescha è la forza idraulica in factur impurtant en il Grischun. Ella furmia ultra da quai ina pitga impurtanta da la strategia d'energia 2050 da la confederaziun.

Germania impunda 17 milliardas per energias regenerablas

En Germania, il margà europeic il pli impurtant per la branscha, sajan vegnids deliberadas l'onn passà 17 milliardas euros per la promoziun da novas energias regenerablas, menziuna *Andreas Felix*. Quests daners vegnian incassads supplementarmain tar la clientella sin il pretsch dal martgà ed alura repartids – senza als metter sin il margà – als producents independents d'electricità solara e da vent. «Miss en relaziun cun il consum en la Germania vul quai dir ch'il pretsch dal martgà vegnia privà da var 40 euros per ura da megawatt (var 5 raps/kWh).», scriva *Felix*. Questa promoziun statala sfalsifitgeschia il martgà. Il fatg ch'ils producents independents survegnan ils daners cur ch'els produceschan l'energia e betg cur ch'ella vegnia duvrada fa ch'il pretsch dal martgà sco tal sa reducescha vinavant fermamain. Quai saja in circol vizius.



Sin incarica da la fracziun burgais-democratica ha inoltrà deputà *Andreas Felix* ina incumbensa parlamentara per lantschar ina iniziativa chantunala per mantegnair la valur da la forza idraulica a la confederaziun.

FOTO M. HARTMANN

Promoziun d'ovras electricas pitschnas che èn nunrentablas

Er en Svizra vegnian gia promovidas massivamain ovras electricas pitschnas nunrentablas cun actualmain 0.45 raps/kWh (270 milliuns per onn, garantids per 15 fin 25 onns!). Questa produziun duai tenor la voluntad da la cumissiun per ambient, planisaziun dal territori ed energia dal cussegl naziunal schizunt anc vegnir

triplada (da nov sin 900 milliuns per onn). Da l'autra vart cumbattian las ovras electricas ch'èn raschunavlas or dal puntg da vista da la politica d'energia, da l'economia e da l'ecologia sco las ovras idraulicas grischunas per lur existenza. «La politica d'energia svizra è dal tuttafatg or da sgara en quai che pertutga la politica d'energia, d'economia e da l'ambient», punctuescha *Andreas Felix*.

Era la rait grischuna ha pers substanzialmain valur

Suenter che la rait grischuna da transmissiun haja gia pers substanzialmain valur cun vegnir integrada en la societad naziunala da raits d'electricità swissgrid perdia la forza idraulica grischuna massivamain valur sut las premissas actualas. Emprimas calculaziuns approximativas concernent la forza idraulica en il Grischun han mussà ch'ils retgavs da tut l'electricità che vegn producida en il Grischun èn stads suletta-main l'onn passà per 350 fin 400 milliuns pli pitschens sco che quai fiss stà il cas senza mesiras da promoziun. Da quai pateschian tant las interpresas sezzas sco er il maun public. «Las consequenzas èn fatalas», resumescha *Andreas Felix*. Per l'ina sa reduceschian ils retgavs da las societads d'ovras electricas a las qualas il chantun è participà marcantamain ed uschia manchian al maun public resursas impurtantas per ademplir sias incumbensas. Uschia vegnian er periclitadas investiziuns en ovras electricas relevantas, la mastergnanza perdia incaricas e plazzas da lavur sajan periclitadas. Ultra da quai dastgassia la posiziun da las vischnancas vegnir indeblida massivamain cur ch'ils implants crodan enavos en lur possess.

Pretensiuns dals burgais-democrats

La fracziun burgais-democratica vul perquai pretender cun ina iniziativa chantunala da la confederaziun che l'augment prevì dals meds da promoziun per novas energias regenerablas vegnia sistì e ch'il model existent vegnia remplazzà d'in model orientà al martgà. Sche il model da promoziun duai vegnir mantegnì e/u sch'ils meds da promoziun duain vegnir

augmentads duai l'exclusiun da la forza idraulica sut 10 MW vegnir abolida.

Regenza sustegn l'incumbensa

La regenza accentuescha che la Svizra saja integrada en in'associaziun europeica d'electricità ed uschia pertutgada directamain dals mecanissem dal martgà global e da las cundiziuns generalas. La promoziun da las energias regenerablas – cunzunt en Germania – saja dentant mo in factur dal squitsch da pretschs sin l'energia idraulica. Anc pli virulenta sin il nivel dals pretschs per electricità saja la nauscha situaziun da la conjuntura en l'Europa. Per la Svizra vegnia anc vitiers ch'il martgà d'electricità vegnia fatg en euros. Tut quels facturs influenzeschian oz considerablmain la valur da la forza idraulica ed engrevgieschian las investiziuns per projects d'ovras idraulicas grondas che na profitan betg dals meds finanzia- zials da promoziun.

La regenza è perquai da l'avis ch'i na saja betg raschunavel da promover vinavant massivamain cun daners statals l'installaziun d'indrizz fotovoltaiics fin l'onn 2020. Era sustegn la regenza il giavisch da remplazzar il model existent per promover energias regenerablas tras in model ch'è orientà al martgà. Tenor avis da la regenza stuessan plinavant er ovras idraulicas grondas pudair profitar d'ina promoziun per augmentar l'efficienza. Perencunter vulesse la regenza stritgar dal tuttafatg la promoziun d'ovras idraulicas pitschnas. D'ina midada en la direziun menziunada resultass – tenor persvaziun da la regenza – ina situaziun da gudogn tant per l'ecologia sco per l'economia d'electricità.